


Poeta Ruben Odor a fayece

ORANJESTAD – Ayera a drenta e tristo noticia cu e conocido ciudadano, Ruben Odor a fayece pa un problema di curazon den oranan di madrugada. Ruben tabata un romantico y amante di poesia, y el a yega di publica su obranan literario yen di sensibilidad humano. El a publica diferente buki, entre

otro “Luz y Sombra” (1987), “Mi bida y AIDS” (1993) y My life with AIDS (1994), di cual e ultimo ta parcialmente un traduccion na ingles di “Mi bida y AIDS”. Pero un hecho cu a marca Ruben su bida ta esun cu a haci di dje un “heroe entre e balentenan”. Ruben Odor tabata e prome y unico persona

cu a sali publicamente pa papia tocante su bida y AIDS. E no tabata facil p’e y sigur pa su famia tampoco, pero Ruben cu e sosten di su famia y amigonan a logra combati e virus di HIV, pero el a logra combati tambe e virus di indiferencia y descriminacion den nos comunidad tempo cu papia di Aids tabata un

misterio y tabu. Durante un relato cu a ser publica, Ruben a conta cu di naturalesa e tabata un persona masha sera y ora cu ela haya sa cu e tabatin AIDS, ela isola su mes pa un tempo. E prome aña tabata crucial, e manera cu un persona mester lucha contra e malesa. El a sali for di su aislamiento; ela



wordo yuda pero ela experiencia loke ta “ora cu ningun hende ta comprondebo.”

Ruben su lucha a cuminsa ora cu pa prome biaha ela wordo interna den hospital como patient cu AIDS. E tabata haya entre otro glasnan cu etiketanan cu ta bisa ‘contagia’ y mester a drumi riba laken di papel. Tur e cosnan aki tabata hacie hopi dolor pa motibo cu nan no tabata necesario y a yega un momento cu ela realisa cu e mester a lucha contra e ‘discriminacion’ aki; no solamente p’e sino pa tur esnan cu lo por bini despues di dje.

Ruben Odor a bai laga nos, pero el a laga atras un obra y un enseñansa dor di su personalidad y valor. Nos palabra di condolencia ta bai pa e famia di e fayecido. Cu Ruben sosega na paz.